

Na gran festa per recordèr 70 egn de scola, de èrt, de vita e joentù

N muion de veies studenc, insegnanc e amisc se à binà tel veie fabricat che dal 1941 en cà l'ha vedù crescer e madurèr "te boteiga" joegn da Fascia e da fora de cà. N patrimoni de valores, èrt e cultura



L fabricat senta storica de l'Istitut d'Èrt a Poza.

Scola - En sabeda ai 11 de jugn, l'é stat l'ùltim dì de scola e l'ùltim dì de lezion a la Scola d'èrt. Na lezion segur desferenta che più de dut l'é stat na bela e emportanta lezion de vita. Per dir amò n'outa che chel che conta l'é i raporc anter la persones e demò chisc i fèsc grana la robes, descheche l'é sozedù a la scola d'èrt. Per n dì la scola d'èrt l'ha avert i ujes de duta la aules del fabricat storich e l'ha metù fora na rica selezion de la operes lascèdes dai studenc dal 1941 ensin al 2011.

No più dintornvia n desch, ma stroz per i portesc e fora per la classes e i laboratories, professores e studenc i se à troà amò n'outa duc ensema, per se ciacoler da amisc desche se no fossa passà che pech, pech temp.

Dant te scola e dò te tendon l'é stat desche veder na gran cena de clas de duta la scola d'èrt, con jent de ogne età che à passà i più bie egn de sia vita te anter l'èrt e che

se à vedù danef tedant a chel medemo depent a fresch che i aea vedù fèr su o che i à semper troà tedant a usc.

Te la Pief a Sèn Jan l'é stat dit messa e dò duc ensema se é jic te tendon a Poza, olache la festa é stata averta coi descors ofiziai, prejenté con gaissa da professores e studenc ensema.

Paroles de salut é states portèdes da l'assessora a la cultura del Comun de Poza Renata Mattevi, dò l'é stat l'intervent de la Sorastanta Mirella Florian e enca la Procuradora Donei sun paladina à volù saludèr e rengrazièr. L responsabòl de la Scola d'Èrt, Claus Soraperra ge à dapò consegnà la cartolina de prejentazion de l'atività de chisc setant'egn de scola d'èrt ai ombolc de Fascia e al veie preside de l'ISA Felice Totti, ruà su da Roma apostà per chesta festa. A recort del fondador de l'Istitut d'èrt Giuseppe Soraperra, la medema cartolina ge é stata consegnèda

ence a sia fies Licia e Paola e a sie nez che à inom enca el Giuseppe Soraperra.

L'é stat sport na bona cena per duc i "studenc" che se à prejentà e dapò per duc mùsega e devertiment à dat lèrga a la premiazion del concors de fin de an sul "mattone", a la defilèda e l'encant de la tascas fates dai studenc per l concors de la revista interladina "Gana" e amò al dessegn ledech.


La Sorastanta à volù recordèr duc chi che fin dal prum dì se à dat jù per la scola, chi che no i é più e chi che enveze ogne dì amò laora con empegn e gaissa: "Son stolza de ve raprejentèr, sie de na squadra meraveusa". Nos no podon che se leèr a la paroles de la Sorastanta e esser stolc nos medemi de aer te noscia picola val n patrimoni de èrt, educazion e formazion tant emportant e che, enceben che te n'otra strutura, se auguron l vae inant per semper. (vr)



Fora da la scola l'é stat metù n gran retrat del '63 con i insegnanc de enlouta: Genio Ghetta, Tony Gross, Giuseppe Soraperra, Lino Pederiva e Gino Lorenz.



N muie de veies studenc é rué a Poza per l'ocajion; anter chisc enca l'artist Egidio Petri.



Te portech giusta ite da usc de la Scola d'Èrt a duc i veies studenc ge vegnìa dat n sciatul de legn e n adesif con l logo di 70 egn.



Renato Soraruf sentà jù su n banch da n'outa tedant a sia veia pagela. L medemo Renato l'é enca sul retrat en bianch e neigher tacà su tedò da el.



Veies studenc i à abù l met de se veder dò che i se aea lascià l'ùltim dì de scola te la medema aules de n'outa.